

Cuira daventa «Citad dal chant»

Novas localitads per il chant triling en il Grischun

BARTOLOME TSCHARNER/FMR

■ Il project «Cuira Citad dal chant» daventa realitad. En la Via Comerciala 19 èsi vegnì preschentà ier las localitads che vegnan a servir als chors da la chapitala e dal conturn sco excellents locals da prova. *Christian Klucker* n'è betg mo in dirigent engaschà, mabain gist uschia versà è el sco promotur: Avant trais onns aveva el lantschà cun ina gruppa d'interessents il project «Chasa dals chors» sin l'Arcas a Cuira. Uss al èsi reussì da realisar ses project «Cuira – Citad dal chant» en il quartier City-West.

Perquai che la chasa sin l'Arcas è sa mussada sco memia pitschna per daventar il center dals chors da Cuira, tenor la proposta da Christian Klucker, *Gian-Reto Trepp* e *Heinz Girschweiler*, han els alura desistì da realisar lur project. «Dentant n'ans ha quell'idea betg pli laschada en ruus», di Christian Klucker. Els han cuntinuà la tschertga per localitads adattadas. Sunter avair constatà ch'era las stanzas en l'antieriura scola da dunnas na vegnivan betg en dumonda, è Klucker i a la tschertga d'in'otra soluziun e surtut d'in fautor. Quel ha el chattà en la persuna da l'architect *Thomas Domenig*. Lez è sa laschà intgantar da stgaffir in center per ils chors da Cuira, mettend a disposiziun il spazi basegnaivel en las localitads d'in anteriur lavuratori en la Via Comerciala 19. Il nov «Center dal chant» è era cuntanschibel bain cun ils meds publics u privats.

«Da la pratica, per la pratica.»

L'uniun «Cuira – Citad dal chant», fundada ils 2018, dispona davent d'ussa da pliras localitads spaziusas d'ina surfatscha d'abundants 1000 m² che vegnan mess a disposiziun als chors sco stanzas d'exercitar. Plinavant hai ina biblioteca cun passa 30 000 titels, ina sala cuminaivla cun bistro, ina stanza per sedutas e bier equipadi tecnic. «Nossa finamira è restada quella da rinforzar il chant triling



Las stanzas dal nov center da chant «Citad dal chant» a Cuira èn prontas per vegnir duvradas dals chors.

FOTO FLURIN CLALÜNA/RTR

grischun cun stgaffir in center communal per ils chors da la citad da Cuira e dal conturn e d'als dar in dachasa, nua ch'els pon lavurar e s'entupar per barattar ideas ed experientschas. Nus avain stgaffì in center da cumpetenzza per il chant en general, nua che nus mettain a disposiziun als chors betg mo localitads da far prova, mabain er auters servetschs professiunals, sco cussegliaziuns en dumondas musicalas, agid d'elavurar concepts per programs, organisar concerts, far reclama, rimnar daners e surtut cun porscher diversas scolaziuns», di Klucker che quinta era cun arranschaments da la Federaziun Svizra da l'Europa Cantat e la Concurrènza svizra per chors.

Dar impuls suenter la pandemia

Ma lur center da cumpetenzza duai en emprima lingia dar novs impuls al chant choral che ha patì zunt durant la pan-

demia. Lur organizaziun porscha perquai curs per chantaduras e chantadurs, per dirigentas e dirigents, organischesa referats, inscuters da chant ed auters eveniments chantics. «Cun noss chors vegnin nus er ad ir or en il center commercial «City West» e far provas avertas per purtar il chant tranter la gliued, ed uschia dar nova vigur al moviment da chors.»

Enfin uss èsi gia set chors ch'exerciteschan en las localitads da la «Citad dal chant», ed ulteriurs tschintg han mussà grond interess. Ma il «Center da chors» porscha spazi avunda per anc ulteriurs chors che pon s'annunziar tar Christian Klucker, perquai ch'il center duess vegnir tratg a niz tant sco pussaivel.

Aria netta procura per segirtad

Per realisar il concept tschertga l'uniun, che vegn presidiada da Gian Reto Trepp, il sustegn dal maun public e da fautors da

l'economia privata, fertant che ulteriurs suprastants sco Heinz Girschweiler, Christian ed *Anna Laura Klucker* e lur gidanters procuran per la part pratica. Els han dentant endrizzà las localitads ch'èn ussa prontas per vegnir duvradas. Mintga stanza cuntogna tut il necessari per chantar sco mobiglia adattada, portanotas, stgaffas per mintga chor etc.

Essenzial èsi, che mintga stanza dispona d'in filter che nettegia tutt'aria per 98% en terma da 12-15 minutas, uschia ch'ìls chantadurs pon chantar cun gronda segirtad er en il temp da la pandemia.

Però per Christian Klucker e sia uniun èsi il pli essenzial da pudair porscher cun lur center in lieu d'inscuter e da barat cultural a tut ils chors da la regiun per rinforzar la solidaritad tranter las uniuns ed animar era gliued giuvna da sa participar dal chant che quel survegnia nov anim per sa sviluppar. Ils chors basegnan tal.